



**FONO AOAQ FAITULAFONO.
LEGISLATIVE ASSEMBLY OF SAMOA**

**Lipoti a le Komiti o Mataupu Tau
Faamasinoga, Leoleo & Falepuipui, ma
Faamasinoga o Fanua & Suafa**

i le

**P.P 2014/2015 Nu.119, Lipoti a le Komisi o le
Toefuataiga o Tulafono a Samoa i le
Tulafono mo Alii ma Tamaitai Loia 1976,
Lipoti 05/11.**

(Tuuina atu i le Fono Aoaq Faitulafono)

FAUTUAGA:

Ua fautuaina e le Komiti o Faamasinoga, Leoleo & Falepuipui, ma Faamasinoga o Fanua ma Suafa le Fono Aoaoina ina ia faautagia lana Lipoti.

1. IUGAFONO:

E fautuaina e le Komiti le Fono Aoaoina ina ia:

- Faamaonia le P.P 2014/2015 Nu.119, Lipoti a le Komisi o le Toefuataiga o Tulafono a Samoa i le Tulafono mo Alii ma Tamaitai Loia 1976, Lipoti 05/11 ma;
- Fautuaga a le Komiti ua tuuina atu i lalo.

2. FAUTUAGA:

I le maea ai o iloiloga a le Komiti, e fautuaina ai le Fono Aoaoina e faapea:

Ina ia talia ma faautagia le P.P.2014/2015 Nu. 119, Lipoti a le Komisi o le Toefuataiga o Tulafono a Samoa mo le toefuataiga o le Tulafono a Alii ma Tamaitai Loia 1976. O lea toefuataiga, e mo faamoemoega o le fausiaina o le Tulafono Autu mo Loia ma le Faatinoga o Galuega Faa-Loia.

Peitai, ina ua maea lelei saililiga ma iloiloga a le Komiti, na matauina ai, na faamamaluina le Tulafono Autu mo Loia ma le Faatinoga o Galuega Faa-Loia 2014 i le aso 28 Oketopa 2014, ae le i iloiloaina e le Komiti le Lipoti a le Komisi.

I le maea ai o iloiloga a le Komiti na matauina ai, o nisi o Fautuaga na tuuina mai e le Komisi i lana Lipoti, ua mafai nei ona avea ma vaega o lea Tulafono. Peitai o nisi Fautuaga, ua molimauina e le Komiti, e le o faaogaina i le fausiaina o lea Tulafono.

O lea faafitauli e talitonu le Komiti, e afua mai ona o le le mautu o le faagasologa o taualumaga o lea galuega, i le amata mai i le tuufaatasia o Fautuaga a le Komisi ma tuuina mai lana Lipoti mo le Faamaoniga a le Fono Aoaoina Faitulafono, ma le toe foi atu mo le tapenaina o le Tulafono.

O lea ua faaiugafonoina ai e le Komiti e faapea:-

1. Ia talia ma faamaonia le P.P.2014/2015 Nu. 119, Lipoti a le Komisi o le Toefuataiga o Tulafono a Samoa mo le Toefuataiga o le Tulafono a Alii ma Tamaitai Loia 1976 ma ana Fautuaga, *vagana ai Fautuaga Nu.5, Nu.6, Nu.8,*

Nu.35, Nu.36, Nu.38, ma le Nu.40 ona o nei fautuaga e le o faaaogaina i totonu o le Tulafono fou.

3. ILOILOGA A LE KOMITI:

O le Tulafono mo Alii ma Tamaitai Loia a Samoa na pasia i le 1976 ma le faamoemoe e faatulafonoina ai tiute tauave a alii ma tamaitai loia. O le laasaga muamua lea o se tulafono faapenei ma e pau le toe teuteuga na faia i lenei tulafono talu mai lona pasiaina i le tausaga e 1976 o le fuaiupu 2(2), e faasino i le Tulafono o Faletupe i Fafu atu o le Atunuu 1988 Numera 7, na aofia ai le aiaiga i le faafuaiupu (2). Ae peitai ane, o le tulafono ua 35 nei tausaga o lona matua ma ua manaomia nei le toe fuataiga. O isi pulega faa-faamasinoga e faatusatusa iai ua suia uma lava i tulafono faaonapo nei. O le tulaga lea e alatatau ai ona toe iloilo ma toe fuatai lenei tulafono ina ia utagia tu ma aga faa-Samoa aemaise tu ma aga faaonapo nei.

E taua le galue faa-loia i le faiga faa-faamasinoga o lo tatou atunuu i le taasisia ma le faamautuina pea o le Pule a le Tulafono (Rule of Law). O tulaga faa-polofesa (professional standards) e tatau lava ona taasisia ma faamautuina mo le galuega faaloia e iai lona tiute faifaatasi ma tiute faitaitoatasi. O se tiute e matua loloto lona pulega lelei ma taasisia le fai mea tonu aemaise foi le tulaga faale-tulafono.

O le aotelega o le Lipoti na iloiloaina, e amanaia e le Komiti le galuega fita na faatautaia e le Komisi e pei ona tuuina mai faatasi ma ana fautuaga i le tulaga na taunuu iai le toefuataiga. O Taiala na limataitaiina iai lea galuega, e mo faamoemoega o le fausiaina o se Tulafono fou mo Loia ma le Faatinoga o Galuega Faa-Loia. Peitai, ua faamaonia e le Komiti, na amata faamamaluina lea Tulafono fou ia Oketopa 2014. I le ma le isi, e le o faaaogaina uma Fautuaga o lo o tuuina mai i le Lipoti na iloiloaina, i lea Tulafono fou. E atagia mai ai, e tatau ona toe silasila totoa le Malo i le faagasologa o taualumaga o le auaunaga a le Komisi ina ia mafai ona faaaogaina se galuega na solaupuleina maea mo le fausiaina o so o se Tulafono.

E ui i lea tulaga, ae manatu le Komiti, na uia lava aiaiga ma taualumaga masani o le fausiaina o so o se Tulafono fou, i lea toefuataiga.

I le maea ai o Iloiloga a le Komiti, ua manatu ai ina ia faamaonia ma faagasolo pea Fautuaga ua faaogaina i le Tulafono fou, vagana ai Fautuaga ua le taliaina, ina ia faaleaogaina.

3.1 FAUTUAGA A LE KOMISI O LO O FAAAOGAINA:

1. E ao i loia taitoatasi uma e tuuina atu auaunaga faaetulafono, i le faagasologa o le galuega faa-loia a le alii poo le tamaitai ona tausisia ma mulimulitaia i tiute tauave faavae nei:
 - a) *le tiute tauave e tausisia ai le pule a le tulafono ma ia faafaigofieina ai le pulega o le faamasinoga i totonu o Samoa;*
 - e) *le tiute tauave ia tutoatasi i le tuuina atu o le auaunaga faale-tulafono i le ua manaomia le fesoasoani a le alii poo le tamaitai loia;*
 - i) *i le tiute tauave e faatino e tusa ai ma auaunaga o loo faalagolago iai e o loo faatagisia se fesoasoani mai i loia;*
 - o) *le tiute tauave e puipuia ai, e tusa ma tiute maualuga o le alii poo le tamaitai loia a'o galue ai o se sui ofisa o le faamasinoga ma soo se tiute o le alii poo le tamaitai e tusa ai ma lalo o soo se tulafono ua uma ona pasia, soo se matupalapala faaetulafono a le ua faatagisia atu se fesoasoani ia te ia.*

2. O nei taiala e tatau ona fai ma vaega o le tulafono fou e tusa ai ma le fuaiupu 14 o le tulafono 1976. O malosiaga ma tiute o le Sosaiete o Loia ia faaopoopo atu i le faia o taiala e faatonutonu ai ofisa o le Sosaiete ma amio pulea a ona sui auai. O nei taiala e tatau ona taofia ai i se feagaiga sui uma o le Sosaiete a Loia ma isi tagata uma e i lalo o le tulafono 1976 ia mafai ona faaogaina iai nei taiala. O le mea lea, ua fautuaina ai e le Komisi se faiga faigofie i totonu o le tulafono fou e faatagaina ai nei taiala ia pasia e le 2/3 o le tulaga fulisia i se fono faapitoa a le Sosaiete a Loia.

3. Ia tuu i totonu o le tulafono fou se aiaiga e tuuina atu ai le malosiaga i le Sosaiete a Loia e faatinoina ai pea aoaoga mo nei aoaoga i totonu o tausaga taitasi i soo se mataupu o le a fesoasoani i le atinaeina ma le faaalualuina i luma o le tomai o ona sui auai i soo se tulafono poo suiga i le tulafono i totonu o Samoa. O nei aoaoga e tatau ona matuā tausisia i totonu o le tulafono fou, e avea lea ma se polokalame e mafai ai ona faatuputupulaia le malamalama o loia.

4. O le fuaiupu 31 o le tulafono 1976 e tatau ona teuteuina ina ia avea le Failautusi o le Sosaiete o Loia ma lē na te tuuina atu tusi e galulue ai i tausaga taitasi. O isi matafaioi a le resitara i totonu o le tulafono 1976 e faamautuina pea.

7. O le tuufaatasiga o Ofisa o Loia e tatau ona tatala i loia uma. I le amanaia o tulaga ua oo iai Niu Sila ma Kuiniselani, o sea aiaiga e tatau ona aafia i totonu o le tulafono fou.
9. Ia faatumaina pea le auaunaga tuufaatasi lea e faaulufaleina ai loia i le faamasinoga o loia (o le faamasinoga) ma loia (faufautua).
10. E leai se mea e manaomia ai le tau faamatalaina o le eseese o le va o le 'loia' (o le faamasinoga) ma le 'loia' (faufautua), aua soo se loia lava e mafai ona auauna i mea e lua i le auaunaga 'tuufaatasi'.
11. E tatau ona iai i le Tulafono fou ni vaega mo ē o i latou ua mananao e auauna ma avea tau lava o se loia o le faamasinoga ia faia faapea e tusa ai le Tulafono Laiti e pulea ai 'loia na o le faamasinoga lava'.
12. Ia faatumauina upu ia o 'loia' (mo le faamasinoga) ma 'loia' (faufautua) ma ta'ua latou uma ia o le tulaga lautele o 'loia'. O le faamatalaina o se 'loia' e tatau ona tumau pea o le 'loia' (o le faamasinoga) ma le 'loia' (faufautua) o le Faamasinoga Maualuga.
13. O le tausaga e ulufale ai e 21 tausaga o le matua e tatau ona tausisia pea.
14. O le '*manaomia o le nofomau*' e tatau ona tuuina atu i loia uma mai fafo o i latou ia e mananao ia talia ma ulufale e fai se ofisa faa-loia i totonu o Samoa. E tatau lava ona faaauau pea ona nonofo i totonu o Samoa i se vaitaimi e pei ona manatu le Fono o le Sosaiete a Loia ua lava ma talafeagai. Mo loia mai isi atunuu, e ao ina latou maua, e faaopoopo i manaoga o loo iai i le taimi nei, 'tomai talafeagai o tulafono a Samoa ma le auaunaga faa-loia' ia talia ai ma faaulufale i totonu o Samoa. E mafai ona faia muamua lea tulaga i le suesueina lea o le suega poo se fonu faale-aoaoga i tulafono ma aganuu a Samoa.
15. O se silasila toto e tatau ona tagofia e le Fono a le Sosaiete a Loia i le suesueina o se talosaga mo le faaulufaleina. E pei o lea, o aiaiga o loo iai nei e manaomia se faatalatalanoaga o se vaega masani o le faiga o le faaulufaleina e tatau ona faamalositia ina ia faamautuina ai le tulaga lelei ma le faatuatuaina o sui auai o le auaunaga faa-loia. E faaopoopo atu iai ni faiga i le tautinoga a le tagata lava ia e faatulaga mai ai e lē ua talosaga i le alii po o le tamaitai lona tulaga tauleleia. O lenei itu e tatau lava ona fai i talosaga uma lava mo ē ua fia ulufale i le faamasinoga ma le auaunaga faa-loia.

- 16.** E tatau ona iai se aiaiga e faapea e noatia ai le loia i faiga o le amio pulea pe afai o le alii po o le tamaitai ua lē mafai ona ia aumai uma i luma o so o se faamatalaga e faaono mafai ona aafia le taliaina pe leai foi o lana talosaga a le alii po o le tamaitai. O le tulaga ua mafai e le loia ona tuuina mai faamatalaga talafeagai ma le manaomia, e tatau le ono faaleaogaina le talosaga a le alii po o le tamaitai.
- 17.** I le tuuina atu o tusi molimau mo le amio, o loia o loo tuuina atu ia tusi e ao lava ona lelei ma tauleleia faatasi ma le poto masani sa galue ai i le sili atu i le 5 tausaga ma e silafia lē na talosaga mo le umi e tusa ma le 3 tausaga. E faalagolago foi lea tulaga pe afai o lē na talosaga ua le mafai ona maua se loia e laufali (referee) mo lana amio o ia lea ua le mafai ona ausia manaoga ia e taua i luga. Ua maitauina e le Fono e faapea o le tulafono 1976 e lē faagataina na o loia e laufali (referee) i amio.
- 18.** O le aiaiga o loo iai tusi pasi na faatulagaina atu e tatau ona faatumauiina ma tausisia pea. Ae peitai, e ao lava i le Fono o le Sosaiete a Loia ona matua oo le latou sailiiliga o talosaga mo le talia ma le faaulufaleina pe a manatua mataupu faapea o faamaumauga o tusi pasi lē lelei faiga faasolitulafono na maua muamua.
- 19.** O le agavaa mo le lola lē tumau e tatau ona manino lelei. I nisi faaupuga, o i latou e lē o ni sitiseni Samoa e tatau ona tumau le resitala i le lola lē tumau mo le taliaina i le faaulufale. O le umi o le lola lē tumau e tatau ona iloiloina i le faavae mai le tasi mataupu i le isi mataupu/faamasinoga lea e galue ai le loia mai fafo e faia ai le alii po o le tamaitai po o ua uma le aoga o lana konekalate. O le mea mulimuli e tatau ona maua le fetuutuunai ona o le loia mai fafo o loo faa-konekalate i totonu o Samoa mo se vaitaimi e pei o le 10 tausaga. I lea mataupu, o le loia mai fafo e ao ona ia totogi atu le tusi pasi e galue ai i tausaga taitasi o le mea lea o ia le alii po o le tamaitai e lē manaomia le toe talosaga i tausaga taitasi. O le 6 tausaga lea e faatapulaa ai le lola lē tumau ua tatau ona aveese. O lenei fautuaga ua tatau ona faaaoga i loia e lē o ni Samoa ae na faaipoipo i tagata Samoa ma pe faapefea ona puipuia ai i latou foi i itu tau latou lava i mea e aafia ai.
- 20.** O le aiaiga o le lola tumau e tatau ona tumau e resitala ai sitiseni Samoa. Mo loia mai fafo o i latou o sitiseni Samoa, o se tulaga mautu i le nofo i Samoa e tatau ona aiaia lelei pe afai latou te mananao e faatu se ofisa loia i Samoa. O le umi o le nofo ai i Samoa, o le a lafo atu lea i le Fono a le Sosaiete a Loia.

- 21.** O le faaulufaleina tuu-faafeagai e lē mafai ona galueaina ma faatino i totonu o Samoa. Ae peitai, o lea faiga e tatau ona iloiloaina e le Sosaiete a Loia i le silasila lea i le ofi atu o Samoa i le tulafono laiti a le WTO ma ana faiga faavae.
- 22.** O le aiaiga mo se tautoga o le faaulufaleina e tatau ona tumau o se vaega e aofia ai le taliaina ma le faaulufaleina o se loia.
- 23.** O le tolu tausaga o le poto masani e pei ona manaomia e tatau lava ona faamautinoa pea. O le lima (5) tausaga lea e muamua i le auunaga e tatau ona faaopoopo ma faatele atu i le 8 ina ia fetau mo loia sinia o i latou ia ua umia konekalate a le Malo.
- 24.** E tatau ona iai se aiaiga i le tulafono fou ia aofia ai le manaomia o le nofomau i Samoa mo le tolu tausaga a o lei amatalia le ofisa loia, ina ia mafai ai ona faataga le faatuina o le ofisa loia. O lea ofisa loia e tatau lava ona iai i taimi uma se loia sinia e lava le tomai ma le agavaa.
- 25.** E tatau ona maua i le tulafono fou le faamaoniga o le poto masani e faatino ai le tagofia o tupe a ē ua tu ai ma teugatupe faatausimavaega a loia ia e tatau ona maua ai le maliega o le Fono, a o lei tatalaina le ofisa loia. E tatau foi ona aofia ai le suega o tusi e lē tuua o teuga tupe faa-faamasinoga. E tatau i le tulafono fou ona faaupu ai e nafa le Fono ma le o aoaiga i le taulimaina o tupe a tagata, teugatupe a loia ma isi mataupu e faapena ona aafia ai tupe, pe afai o le loia ae leai se poto masani e tagofia ai tupe a tagata o loo tu ai ma teugatupe faatausimavaega. (Silasila i le Fautuaga 3)
- 26.** E tatau i le tulafono fou ona mulimuli i le tulafono a Niu Sila i ona aiaiga i le amataga o ofisa loia ma aoaoga mo tausisi tusi ma le loteina o tupe a tagata lautele.
- 27.** Ua tatau i le tulafono fou ona manaomia le Fono a le Sosaiete a Loia ia faatuina ma pulea se auunaga e nafa ma tagi. Ia aofia ai iinei se tulaga moomia ai le maua ma ia faasalalau lelei ma atoatoa, nofoaga e mafai ona faaulu atu ai tagi, ma taualumaga e faaogaina i le faaoina atu o ia tagi.
- 28.** E tatau i le tulafono fou ona manaomia ai le Sosaiete a Loia ia faatuina se Komiti po o ni Komiti tumaoti mo le tulaga i le suesueina ma faafofoga i moliaga o amio le pulea ('Komiti o Amio Pulea').
- 29.** E tatau i Komiti o Amio Pulea ona aofia ai se Faamasino o le Faamasinoga Faa-Itumalo o ia lea o le Taitai Suega, toalua sui auai o le Fono e tofia e le Taitai

Suega, toatasi le sui o loia (loia) ma le toatasi le tagata mai tua. O le matafaioi a le Komiti o amio pulea o le faatonuina lea o amio pulea a loia e amata atu i suesuega auiliili ma faafofoga i tagi. O faiga taotooto lava o le lelei faafoe ma le faia o le amiotonu e ao lava ona mataituina i le faatinoina o nei tualumaga.

30. O tagi i amio pulea i lalo o le tulafono fou e tatau ona iai le:

(a) ‘amio lē pulea faa-polofesa’, ua faamatalaina pe faauigaina o se amio e fesootai atu i le auaunaga o le tulafono o lea ua lē oo i le tulaga moomia o le atoatoa ona faatino ma lelei faafoe e faapea o se tagata mai le atunuu e mafai ona ia maua se auaunaga faa-loia talafeagai lelei; ma

(e) Ua faamatalaina le ‘amio lē pulea faa-polofesa’ e faapea:

(i) *o le amio lē pulea faa-polofesa, lea ua aafia ai le amioga o se tulaga tele po o ua le oo pe tausisia se tulaga talafeagai o le atoatoa ona faatino ma lelei ona faafoe; ma*

(ii) *amio – tusa pe tulai mai i le fesootai atu i le auaunaga faa-loia po o se isi lava mea – o le a faapena, pe afai e faamautuina, ua faamaonia se mea ua maua e faapea o le loia ua lē fetai ma o se tagata ua lē talafeagai e auauna i le auaunaga faaletulafono/faa-loia.*

31. E tatau i le tulafono fou ona aafia ai se lisi/faasologa o amioga e faapea e mafai ona oo atu i le ‘amio lē pulea faa-polofesa’.

32. O le amio lē taupulea a se loia o le faamasinoga ma loia faufautua e tatau ona suia i le amioga lē pule faa-polofesa.

33. E tatau i le tulafono fou ona manaomia se Komiti o Amio pulea na te suesueina tagi uma ua maua/talia e le Sosaiete a Loia a Samoa e faasino i loia po o ē sa galulue faa-loia se vagana, i le taofi o le Fono:

(a) *o le umi o le taimi e faapea ua alu i le va o le mea na tupu lea e faapea o le autu o le tagi ma le aso lea na faia ai le tagi ua faigata ai ona faatino le suesuega po o ua lē toe manaomia;*

(e) *ua lē talafeagai le mataupu autu o le tagi;*

(i) *o lē tagi e lē toe manao e faaauau le faia o lana tagi;*

(o) *o lē na tagi ua lē lava lona loto iai i le mataupu; po o*

(u) *o se fofo talafeagai o loo maua mai nisi auala.*

34. O le fuaiupu 36 o le Tulafono mo Alii ma Tamaitai Loia e tatau ona teuteuina ia manaomia ai se Komiti o Amio pulea e amatalia ai se suesuega lea e maua ai e le

Komiti mafuaaga talafeagai e masalomia ai e faapea ua faamaonia se amio lē pulea faa-polofesa ma le lē lelei a se loia.

- 37.** E tatau i le tulafono fou ona manaomia le Sosaiete a Loia ia logo le ua tagi e auala atu i se tusi:
- (a) ina ua maua le tagi a le alii poo le tamaitai;*
 - (e) pe afai na faia se faaiuga a le Komiti o Amio pulea e le suesueina le tagi ma/poo faia se suesuega, mafuaaga mo lea faaiuga; ma*
 - (i) pe afai o fautuaga (a) ma le (e) ua talia ma faatinoina o le aia tatau o le ua tagi e saili se toe suesuega o faiga ma faaaoga e le Komiti o amio pulea.*
- 39.** O le Tulafono mo Loia e manaomia ona aiaia ai le Fono a le Sosaiete a Loia e faatinoina ai se taualumaga faa-faamasinoga e tusa ai ma tulafono o le amiotonu.
- 41.** E tatau i le Tulafono fou a Loia ona manaomia ai Komiti o Amio pulea ona tuuina atu mafuaaga tusitusia mo soo se faaiuga, e aofia ai ma le tatau o soo se faasalaga ua tuuina atu. O se ata o mafuaaga e tatau ona auina atu i le Fono a le Sosaiete a Loia, le loia lea e faasaga iai le moliaga ma lē ua tagi.
- 42.** O le tulafono fou a Loia e tatau ona taofiofi le malosiaga o le Fono na te tuuina atu ai se faateaga lē tumau i se loia i tulaga ua manatu le Fono o le vave faatea ua talafeagai ua faavae i luga o le matuia o le tagi lea ua uma ona faia.
- 43.** I matāupu taitasi uma lea e faia ai e le Fono se sa'iliga o se amio lē pulea e faapea 'o amioga faapōlōfesa ua lē manuia' e faaaoga e se lōia, e tatau i le Fono ona iai le malosiaga e:
- (a) Tuuina atu ni aiaiga faapitoa i le tusipasi galue o le lōia;*
 - (e) Manaomia le lōia ia faia ma ia mae'a se a'oa'oga faapitoa mo nisi a'oa'oga faalōia faaopopo;*
 - (i) Manaomia le lōia ae faia se piriota/vaitaimi ua faatulagaina o le auaunaga i lalo o se vaaiga faapitoa;*
 - (o) Manaomia le lōia ia faia po o le 'aua le faia se mea e fesoota'i atu i le auaunaga faalōia;*
 - (u) ia faia ma avanoa le auaunaga faalōia mo se asiasiga faa-vaitaimi e se tagata faapitoa mo se vaitaimi faapitoa;*
 - (f) manaomia ai le lōia e faatoese i se tagata poo ni tagata;*
 - (g) manaomia le lōia e totogi atu se tau (e oo atu i le aofa'iga ua faatulagaina mai;*

- (l) *manaomia le lōia e toe totogi le aofa'iga atoa po o se vaega ua faatulaga atu o le aofa'iga na totogi atu mo auaunaga faalōia e pei ona taua i luga e faasino i le tagi;*
- (m) *manaomia le lōia e faalēaoga / solia po o le faaitiitia le totogi o le alii po o le tamaita'i lōia faasino i le auaunaga lea e faasaga iai le tagi; ma*
- (n) *manaomia le lōia e fetuunai uma lava totogi a le alii po o le tamaita'i soo se sese po o le mea ua lē faia lea e faasino i le auaunaga lea e fesoota'i atu i le tagi.*

Ia faamauina: I le tulaga e tulai mai ai ua lē usitaia e se lōia galue se faai'uga a le Fono a le Sosaiete Lōia, e mafai e le Fono i se faai'uga mulimuli ona tuuina atu faasalaga i lalo o 'amio lē pulea' o i totonu o le Fautuaga 44 o i lalo atu.

44. I matāupu taitasi lea e faia e le Fono ma iloiloga o amio pūlea 'amiogalue pulea faapōlōfesa' e faaaga i se lōia, e tatau i le Fono ona faamalosiā malosiaga ia e mulimuli mai ia ua uma ona maua i le fuaiupu 37 o le TATL:

- (a) *poloa'ina e faapea o le igoa o le lōia ia aveese ma le tusi faamau o lōia (o le faamasinoga) ma/poo le lōia (faufautua); poo*
- (e) *tuuese lē tumau le alii po o le tamaita'i mai le auaunaga o se lōia (o le faamasinoga) ma/poo se lōia (faufautua) mo se vaitaimi e lē sili atu i le tolu tausaga;*
- (i) *e otometi le tuuese mai le faamasinoga pe a faamaonia se moliaga faasoligātulāfono.*

I matāupu taitasi uma lea ua faamaoniaina ai se moliaga, e mafai e le Fono ona:

- (o) *poloa'ina le loia ia le toe auauna le alii po o le tamaita'i na o ia sei vagana ua faataga mai e le Fono ia faapea ona faia;*
- (u) *poloa'ina le loia ia totogi se faasalaga tupe i le Sosaiete a Loia ia le sili atu i le 10 iunite le faasalaga;*
- (f) *faalauiloa le loia; ma*
- (g) *poloa'ina le loia e toe faaoo le tupe a le Sosaiete ma totogi ma galuega na fai o le su'esu'ega ma le sailiiliga o le mataupu.*

Maitauina: Afai e talia Fautuaga 43 ma le 44, o le taimi faatulagaina mo le tausisia o nei tulaga e 21 aso mai le aso o le faaiuga.

3.2 FAUTUAGA A LE KOMISI E LĒ O FAAAOGAINA

5. E tatau ona toe teuteuina le fuaiupu 15(6) ina ia faaitiiti le aofai o sui auai i se fonu i le 30 pasene o sui tumau ua uma ona totoigi lo latou auai ai. I le tulaga la o le lē maua o le aofaiga o sui auai e usu ai se fonu ma toe tolopo ai, o sui auai e faatasi atu i le fonu ua tolopo e tatau ai lava lea mo le faaauauina o le fonu.
6. E tatau lava i le tulafono fou ona matuā faaupu mai e faapea, o le Loia Sili o le sui auai o le Fonu a Loia. O le Loia Sili i lona tulaga o le faaao o le vasega o Loia a Samoa e tatau ona avea ma sui e palota o le Sosaiete a Loia i fonu faale-tausaga e tusa ai ma le fuaiupu 15(8) o le tulafono 1976.
8. O loia ua avea ma Minisita po o Sui Minisita, pe umia foi tulaga maualuluga e pei o le Ao o le Malo po o le Fonu a Sui Tofia e le tatau ona toe faaauau le avea ma loia o le faamasinoga ona e faaono tele se itu e feteenai ai le aafia ai o ia ma le pulega-malo ma le itu e faia tulafono a le malo.
35. Ua fautuaina e le Komisi e faapea e tatau i le Komesina o Sulufaiga po o se isi tino ona nafa/talafeagai tonu ma le mataituina o galuega tau le amio pulea a le Sosaiete a Loia. Ia aafia ai nisi faaiuga na faia ‘aua nei suesueina se tagi po o le amataina o se suesuega/faamasinoga.
36. E tatau i le tulafono fou ona manaomia le Komiti o Amio pulea ia nafa ma tagi i se tulaga lelei ma atoatoa lona faatinoga. O le fautuaga a le Komisi e tatau i le Komiti ona tuuina atu ia tulaga i le Fonu mo se latou iloiloga. O le taimi faatapulaa e tatau ona 30 aso e fofoga ai ma faia faaiuga o tagi.
38. Afai ae talia le fautuaga 37, e tatau ona logoina e ua tagi i o latou aia tatau e saili ai se toe suesuega o faiga ma auala na faaogaina e le Komiti o Amio pulea, e aafia ai soo se faaiuga e aua le suesueina le tagi po o le faatulai pe amata se suesue/faamasinoga. E tusa ai ma le Fautuaga 35, o tiute ma matafaioi a le Sosaiete a Loia e tatau lava ona iai le silasila a le Komesina o Sulufaiga po o se isi tino.
40. O faamasinoga o amio pulea e tatau ona faia i luma o tagata, sei vagana ua faia e le Fonu se poloaiga e ese ai i luga o le faavae e faapea o lea tulaga e le lelei mo tagata lautele.

4. FESOASOANI (T.T. 156)

Ao faagasolo Iloiloga a le Komiti, na mafai ona tapa le fesoasoani a le Ofisa ua taua ia lalo.

Komisi o le Toefuataiga o Tulafono a Samoa.

Leota Theresa Potoi	-	Faatonu Sili o Pulega
Pale Fuimaono	-	Sui Faatonu Sili o Pulega

5. FAAFETAI A LE KOMITI:

E faamauina le agaga faafetai ma le faamalo a le Komiti i le Komisi o le Toefuataiga o Tulafono a Samoa, i suesuega ma galuega tauave aua le tuufaatasia o lenei Lipoti taua ina ia ausia ai le sini autu a le Komisi ma le Malo.

6 PEPA NA ILOILOINA:

(Faataatia 21/10/2014)(Tuuina atu 22/10/2014)

P.P 2014/2015 Nu.119, Lipoti a le Komisi o le Toefuataiga o Tulafono a Samoa i le Tulafono mo Alii ma Tamaitai Loia 1976, Lipoti 05/11.

TUISA Tasi Patea
TAITAIFONO

AFOAFOUVALE John Moors
SUI TAITAIFONO

TAPUAI Toese Ah Sam
SUI USUFONO

LAFATELE Patrick Leiataualesa
SUI USUFONO

PAPALII Lio F Taeu Masipau
SUI USUFONO

LENATAI Victor Fafoi Tamapua
SUI USUFONO

LEFAU Harry Schuster
SUI USUFONO